

ESKU-HUSKA. Unanue-Olaizola II.a partida Iruñeko Labriten jokatu litzateke, asteartean

EPELek astebeteko atzerapena ukatu dio Olaizolari, baina bi egunekoa eman

Neurri horrekin ez dela lau t'erdiko lehiaketaren egutegia urratzen argudiatu du Enpresen Ligak

Enekoitz Telleria | **DONOSTIA**

Zirt edo zart egin, eta baiezeko edo ezezko biribila eman beharrean, konponbiderik aldrebesenaren bidetik jo zuen atzo iluntzean Eskuzko Pilota Enpresen Ligak. Ukatu egin zion Aimar Olaizolari Goizuetakoak goizean Iñigo Simon medikuarekin batera adostu eta eskutako astebeteko atzerapena, baina bi egunekoa eman zion. «Asteburuko jardunaldia igandeaz harantza joaten baita pilotan eta 48 orduren barruan jokatuz gero ez da lehiaketako egutegia urratzen», adierazi zion atzo EGUNKARIARI Iñigo Salbideak, EPELen Kirol Batzordeko kideak eta Asegarce enpresako gerenteak. Pilotariari, Julian Arruabarrena EPELeko presidentek eman zion erabakiaren berri. «Ez da astebete nik nahi nuen bezala, baina bi egun gehiago dira eta saiatuko naiz eskua ahalik eta ongien jartzeko», esan zuen Olaizolak kontsultatik irten berritan.

Goizeko 11:00etan joan zen atzo Aimar Olaizola Iñigo Simon medikuarenera, Gasteizera. Eskuin eskua oraindik handi-

AIMAR OLAIZOLA

Asegarceko aurrelaria

«Ez da astebete nik nahi nuen bezala, baina bi egun gehiago dira eta saiatuko naiz eskua ahalik eta ongien jartzeko»

tuta zuen, baina aurreko egunean baino gutxiago. Ultrasoi- nuak eta laserra ipini zizkioten. «Eskua nahiko gaizki dago. Neronek nabaritu dut lehen neukan ubelunea orain agian ez dela horren handia, baina mina berdin-berdin ematen dit. Medikuek eta biok hitz egin dugu eta astebeteko atzerapena eskatzea erabaki dugu. Ikusi egin beharko da orain zer esaten diguten», esan zuen Olaizolak kontsultatik irten berritan.

Julian Arruabarrena EPELeko presidentek aspertu arte errepikatu du astean zehar araudiak ez duela horrelakorik baimentzen eta ezin zaiola Olaizolari atzerapenik eman. Arratsaldean, ordea, EPELen Kirol Batzordea bildu zen Zarautzen —Julian Arruabarrenak, Iñigo Salbideak, Julian Retegik, Fernando Bidartek eta Patxi Mutiloak osatzen dute— eta, ia bi orduko bileraren ostean, Olaizolari bi eguneko atzerapena ematea onartu zuten.



RAUL BOGAJO / ARGAZKI PRESS

Aimar Olaizolaren eskuin eskua, atzo, medikuarenetik irtendakoan.

Erabakiaren berri jakin ostean Mikel Unanurekin ere harremanetan jarri zen EGUNKARIA. Añorgakoak ez zuen adierazpenik egin nahi izan. «Orain bat-batean eta beroan nahiago dut ezer ez esan, bihar hitz egingo dugu», esan zuen.

Atzo, bestalde, Barriola-Esain partidarako pilota aukeraketa egin zen Labriten. Ez zen arazorik izan, nahiz eta Esainek nahi zuen pilotarik ez zuela topatu esan. Barriolak ere jota bukatu zuen joan den igandeko partida, baina osatu da.

TXOKOAN

PALA

Torrek eta Urkiak Insaustirekin jokatzeo aukera dute gaur jokoan

Euskadiko Buruz Buruko Pala Txapelketako final-zortzirenetako partida jokatuko dute gaur Jon Torrek eta Iñigo Urkiak, Bilboko Deportivo pilotalekuan. Final-laurdenetan Oscar Insausti txapeldunaren kontra jokatzeo txartela dute jokoan. Lehen partida da Torre beterranoarentzat eta bigarrena Urkiarentzat —Garma utzi zuen kanpora (35-27)—.

ESKU-HUSKA

Euskal Liburu eta Disko Azokaren 2. Eskupilota Txapelketa, Durango

Gaur jokatuko dira Durango-ko Ezkurdi pilotalekuan Euskal Liburu eta Diskoen Azokaren 2. Txapelketako lehen bi finalerdiak (19:30). Beitia eta Olazabal ariko dira lau t'erdian, eta irabazleak Arretxe II.a du zain biharko finalean. Gandiaga-Escudero eta Uriarte-Iraetak jokatuko dute binaka, eta Retegi Bi-Beobide daude zain finalean. Buruz buru, Castillo eta Amantegiren artean da finala.

JAIALDIK

GAURKO PARTIDAK GALARRETA. 16:00.

Zeberio III.a-Barrenetxea II.a / Zalakain-Lander. Altuna II.a-Etxabe / Iñigo-Lizaso. Agirresarobe-Eizagirre / Altuna I.a-A. Lekunberri. Bereziartua-Urko / Sarasua-Ekiza.

DEPORTIVO. 17:00.

Casado-Garma / Urkijo-Fernando. Daniel-Rekalde / Iriondo-Beldarrain. Euskadiko Txapelketa: Torre / Urkia.

ERREMONTA. Hernaniko Galarretan egin zuten atzo larunbateko final handirako pilota aukeraketa, eta ez zen arazorik izan

Hiru hilabete geroago, Ezkurra eta Zeberio II.a prest daude buruz buruko finala jokatzeo

E. Telleria | **HERNANI**

Lau t'erdian gertatutako guztia- ren zalapartak erdi estalita, baina Buruz Buruko Bingo Londres Txapelketaren finala jokatzeo garaia ere iritsi da. Larunbatean da Ezkurra eta Zeberio II.a-aren artekoa, Galarretan, eta atzo egin zen frontoi berean pilota aukeraketa. Ohi baino luzeagoa izan zen (ordubete), baina bi pilotariak gustura gelditu ziren aukeratutakoarekin. Ezkurrak, 122, 120, 119 eta 117 gramoko pilotak. Zeberio, 118ko hiru

eta 121eko bat. Bienak ezaugarri berdintsukoak: biziak eta azpitik dabilzanak.

Irailaren 7an jokatu beharreko finala hiru hilabete geroago jokatuko da azkenean. Bi lesio izan ditu Ezkurra txapeldunak tarte horretan (abenduaren 31n eta irailaren 26an) eta emaztearen zoritxarreko heriotza ere bai (urriaren 10ean). Arazo guztiak gainditzeko indarra izan du Doneztebekoak, eta «konfiantza» agertu zen atzo larunbateko finalari begira. «Bi hilabete neramatzan jokatu gabe, baina fres-

ko nengoen. Kontua da buru aldetik nebilela apur bat nahastuta, baina arazo guztiak gainditu ondoren hobeto hasi nintzen. Fisiko aldetik ez nion prestakuntzari inoiz utzi eta gustura irtentzen nintzen kantxara berriro. Konfiantzarekin nengoen eta horrekin dena gainditu daiteke», esan zuen atzo.

Zeberio II.ak, Eizagirre eta Aizpuru gainditu zituen abuztuan Ezkurraren kontrako finalera iristeko. «Irailarako zen nire prestakuntza eta jada bi partida jokatuta nengoen, bidea eginda neukan nolabait. Kotetoren lesioekin dena atzeratu egin zen eta pentsatzen dut bera ere ez dela irailean bezala egongo», onartu zuen Elduaingoak.

Larunbateko finalean gakoe-



IMANOL OTEGI / ARGAZKI PRESS

Koteto Ezkurra eta Patxi Zeberio, atzo, Galarretan.

tako bat sakea izango dela nabarmendu zuten biek; biak direla pilotari «langileak» eta partida «gogorra» iragarri zuten hurrena. Aukera duen bakoitzean arriskatzera irtengo dela aurre-

ratu zuen Zeberio. Hasieran eutsi eta ondoren apurtzera Ezkurrak. Bere zazpigarren txapela lor dezake Doneztebekoak. Lizasok bakarrik gainditu du final batean (2000).